

# EX CONSENSV TOTIVS INCLYTAE

FACULTATIS MEDICINAE, CHRISTOPHORVS

Heiperger, artium Magister & Medicinæ studiosus, sequentes quæstiones unâ cum positionibus, Deo Opt. Max: iuuante, pro uirili defendere enitetur.

## QVAESTIO PRIMA.

V. **M**orborum constitutiones, anni tempora, accessionum incrementa, & reliqua morbo superuenientia, Hippocrati dicta: ad iudicanda & distinguenda uniuersalia morbi tempora sufficiant.

### POSITIO PRIMA.

Generosi Medici & Hippocratica doctrina digni officium est, uniuersalia morbi tempora, præcipue autem uigorem præcognoscere.

II.

Ita enim salubrem uictus rationem ægro præscribet: & futuram morbi solutionem, aut mortem prædicet, sicq; internecionis culpa uacabit.

III.

Eorum autem discrimina (Hipp. teste) morbi species primò ostendit.

IIII.

Si enim hæc eiusmodi fuerit, ut peracutus uel acutus sit morbus, alia adeoq; breuiora habebit uniuersalia tempora, q̄ si diuturnus esset.

V.

Quippe quartana aliqua febris inuadens, non solum primam accessionem pro principio habet: sicut neq; exquisitè tertiana usq; ad septimum diem principium extrahere potest.

VI.

Considerandum deinde an tempora anni naturalem suam temperiem retineant: an uerò ab ea, & in quantum recedant.

VII.

Tertiò ex incrementis accessionum prædicta tempora dignoscuntur, si ea inter se conferendo consideremus, num anticipent, uel post occupent, uehementiora sint aut non.

VIII.

Postremò, quæ postq; morbus cepit apparent & superueniunt, diligenter Medico sunt perpendenda.

IX.

Inter ea autem prima & maximè præcipua sunt concoctionis signa, ex quibus principium iam finitum exquisitè cognoscet: ex hoc autem futurum uigorem.

### CONCLUSIO.

Proinde, ut rectissimè monet Galenus, omnia iam enumerata, si modo ad exquisitam temporum morbi cognitionem peruenire uoluerimus, coniungenda sunt.

## QVAESTIO SECUNDA:

V. **P**urgantibus medicamentis, turgentis materiae euacuationem, per loca conferentia, statim primo die aut alijs adeoq; decretorijs diebus, rationabiliter Medicus moliri possit ac debeat.

### POSITIO PRIMA.

Natura in morbi principio, dum crudi adhuc sunt humores, nullam euacuationem instituit: post concoctionem autem & humores discernit, & superfluitates expellit.

II.

Medicus ergo, qui naturæ minister est, humores crudos, in aliqua corporis parte firmatos, priusq; ad benignum reducti fuerint, non euacuabit.

III.

Alias enim humoribus crudis, crassis & uiscosiss, angustas uias, per quas id quod Medicamentum deijcit, ferri ad aluum debeat, obstruet; cruciatus circa umbilicum & mordicationes, animiq; deliquia creabit.

IIII.

Si uero humores noxij turgeant, id est, per totum corpus moueantur, ab uno membro ad aliud ferantur & transfluant, ægrumq; nulla ratione quiescere permittant, medicamento uti purgante in principio, secundum Hippo: & Gal. doctrinam licebit.

V.

Priusquam uidelicet aut robur corporis dissoluatur, aut humores per totum corpus uagantes, ad aliquod principale membrum decumbant.

VI.

In quibus euacuandis, & humoris peccantis motum, & partis naturam, per quam eiusmodi uacuatio fieri debet, Medicus animaduertet.

VII.

Quæ enim ducere oportet, quò maximè natura uergit per loca conferentia, eò ducere oportet.

Ioannes Aurbachius Christophoro Heiperger S.

**P**rotonas discis sectator strenuus artes  
Adq; artem rectè tendis Apollineam  
Non uaga conscendis, dubij uestigia cursus.  
Quoq; patet rectum tramite, pergis, iter.

Nempe colis celebres doctis congressibus actus,  
In quibus à uera cernitur arte dolus.  
Ergo Machaonia quondam fulgebis in arce,  
Non modò sint uitæ tempora parua tua.

Ad proximum diem Veneris, in auditorio Canonistarum, hora septima antemeridiana.

